

Na osnovu čl. 13. i 14. Poslovnika o radu Koordinacionog odbora centralnih jedinica za harmonizaciju, člana 2. stav (1) Odluke o usvajanju procedura za stvaranje, evidentiranje obaveza i izvještavanje o izvršenju budžeta KO CJH, broj: KO-11/2017 od 19.10.2017. godine, a u vezi sa članom 2. stav (3) Odluke o budžetu Koordinacionog odbora centralnih jedinica za harmonizaciju u Bosni i Hercegovini za 2025. godinu, broj: KO-3/25 od 28.02.2025. godine i Programom rada Koordinacionog odbora centralnih jedinica za harmonizaciju za 2025. godinu, broj: KO-1-1/25 od 30.01.2025. godine, Koordinacioni odbor centralnih jedinica za harmonizaciju na 9. sjednici, održanoj 15.09.2025. godine d o n o s i

O D L U K U

o odobravanju sredstava budžeta KO CJH za realizaciju godišnje konferencije o finansijskom upravljanju i kontroli u javnom sektoru u Bosni i Hercegovini u 2025. godini

Član 1.

- (1) Koordinacioni odbor centralnih jedinica za harmonizaciju (u daljem tekstu: KO CJH), shodno planiranim aktivnostima iz Programa rada KO CJH za 2025. godinu, organizuje dvodnevnu godišnju konferenciju o finansijskom upravljanju i kontroli u javnom sektoru u Bosni i Hercegovini u 2025. godini.
- (2) Naziv konferencije iz stava (1) ovog člana je „Osma godišnja konferencija o finansijskom upravljanju i kontroli u javnom sektoru u Bosni i Hercegovini“.
- (3) Konferencija iz stava (1) ovog člana biće održana 18. i 19. novembra 2025. godine na području Republike Srpske.
- (4) Tačno mjesto održavanja konferencije biće određeno naknadno, nakon okončanja provođenja postupka javne nabavke pružanja usluga organizacije konferencije iz stava (1) ovog člana.

Član 2.

- (1) Konferencija je namijenjena koordinatorima za finansijsko upravljanje i kontrolu zaposlenim u institucijama Bosne i Hercegovine, u javnom sektoru Federacije Bosne i Hercegovine, Republike Srpske i Brčko distrikta Bosne i Hercegovine.
- (2) Učesnici konferencije su predstavnici centralnih harmonizacijskih jedinica, predavači i koordinatori za finansijsko upravljanje i kontrolu
- (3) Planirani ukupan broj učesnika na konferenciji je 150, od čega 50 učesnika iz institucija Bosne i Hercegovine i Brčko distrikta BiH, 50 učesnika iz Federacije BiH i 50 učesnika iz Republike Srpske.
- (4) Učesnicima konferencije iz prethodnog stava obezbijeđen je smještaj na bazi jednog polupansiona za vrijeme trajanja konferencije.
- (5) Za 15 predstavnika centralnih harmonizacijskih jedinica koji učestvuju u organizaciji konferencije, te za predavača obezbijeđeni su smještaj i ishrana i za dan prije početka konferencije (jedan polupansion) u svrhu organizacijskih priprema konferencije.
- (6) Svim učesnicima konferencije biće obezbijeđen ručak i osvježavajući bezalkoholni napitci tokom trajanja konferencije.

Član 3.

- (1) Konferencija je planirana plenarno oba dana za sve učesnike, prema usaglašenom sadržaju i agendi.
- (2) Agenda konferencije biće izrađena naknadno i činiće prilog ove Odluke.
- (3) Za tehničku podršku učesnicima u vezi sa informacijama o smještaju, prijavama i obavještavanjem učesnika, kao i ostalim sadržajima konferencije, KO CJH će imenovati po jednu osobu iz svake centralne harmonizacijske jedinice.

Član 4.

- (1) Procijenjeni ukupni troškovi smještaja za učesnike, predavače, predstavnike centralnih harmonizacijskih jedinica i snimatelja konferencije, troškovi ručka i osvježenja za sve učesnike tokom trajanja konferencije, te troškovi same organizacije konferencije iznose najviše do 35.000,00 KM sa PDV-om.
- (2) Ukupne neto naknade za eksterne predavače iznose do 3.000,00 KM.
- (3) Ukupna neto naknada za troškove snimatelja konferencije iznosi do 1.000,00 KM.
- (4) Centralna harmonizacijska jedinica Ministarstva finansija i trezora BiH zadužena je da obezbijedi tehničku podršku za evidentiranje rashoda i izmirenje obaveza putem Ministarstva finansija i trezora BiH.

Član 5.

- (1) Centralna harmonizacijska jedinica Ministarstva finansija i trezora BiH zadužena je da provede postupak javne nabavke pružanja usluga organizacije konferencije u skladu sa Aneksom II Zakona o javnim nabavkama Bosne i Hercegovine („Službeni glasnik BiH“, br. 39/14, 59/22 i 50/24).
- (2) Nakon sačinjene tenderske dokumentacije od strane Centralne harmonizacijske jedinice Ministarstva finansija i trezora BiH, svi članovi KO CJH dužni su dati saglasnost na tekst iste.
- (3) Centralna harmonizacijska jedinica Ministarstva finansija i trezora BiH će, nakon okončanja postupka javne nabavke, obavijestiti KO CJH o odabiru najpovoljnijeg ponuđača i mjestu održavanja konferencije.

Član 6.

- (1) Predavači na konferenciji su predstavnici centralnih harmonizacijskih jedinica i eksterno angažovani predavači.
- (2) U svojstvu eksternih predavača biće angažovano do šest stručnih osoba, čija će prava i obaveze biti regulisani zaključivanjem ugovora o djelu.
- (3) Planirani eksterni predavači i njihove teme na konferenciji biće utvrđeni naknadno i činiće prilog ove Odluke.

Član 7.

- (1) Ugovore iz člana 6. stav (2) ove Odluke će u ime KO CJH zaključiti Centralna harmonizacijska jedinica Ministarstva finansija i trezora Bosne i Hercegovine, i u istima će utvrditi pojedinačnu naknadu i ostale troškove u vezi sa obavezama i prisustvom na konferenciji.
- (2) Obaveze eksternih predavača biće detaljno precizirane u svakom pojedinačnom potpisanom ugovoru o djelu.

- (3) Ukupna pojedinačna naknada po osnovu obaveza predavača iznosi 500,00 KM u neto iznosu po jednom predavaču, a pripadajuće poreze i doprinose plaća KO CJH u skladu sa zakonskim propisima.
- (4) Visina naknade obuhvata pripremu prezentacije, predavanje i učestvovanje u diskusijama, a utvrđuje se na osnovu procijenjenog broja sati za pripremu i planiranog vremena trajanja prezentacije.
- (5) Za predstavnike centralnih harmonizacijskih jedinica ne obračunava se i ne isplaćuje naknada za učestvovanje u realizaciji konferencije.

Član 8.

Troškove prevoza predavača i snimatelja konferencije radi prisustva konferenciji KO CJH snosi organizator, u iznosu od 20% cijene litre benzina (Eurosuper 95) na dan održavanja konferencije po pređenom kilometru, u zavisnosti od udaljenosti mjesta prebivališta do mjesta održavanja konferencije, te će naknada biti utvrđena posebnim rješenjem a plaćanje će biti izvršeno kroz ISFU sistem.

Član 9.

- (1) Centralna harmonizacijska jedinica Ministarstva finansija i trezora Bosne i Hercegovine, u ime KO CJH, zaključit će ugovor o djelu sa kamermanom/snimateljem, predloženim od strane KO CJH za video snimanje cijelog toka Konferencije.
- (2) Ugovorom iz prethodnog stava biće precizno definisane obaveze kamermana/snimatelja.

Član 10.

- (1) Sredstva za realizaciju konferencije obezbijedena su u budžetu KO CJH za 2025. godinu.
- (2) Evidentiranje obaveza, plaćanje i izvještavanje vrši se u skladu sa Odlukom o usvajanju procedura za stvaranje, evidentiranje obaveza i izvještavanje o izvršenju budžeta KO CJH broj KO-11/2017 od 19.10.2017. godine.

PREDSJEDAVAJUĆA KO CJH


Belma Islamović

Broj: KO-15/25

Sarajevo, 15.09.2025. godine

Dostaviti:

- članovima KO CJH,
- internet stranica CHJ MFiT BiH – KO CJH,
- a/a.